

Auendorfer Sommerfest 2010

Ladbriaf

B'suach aus dr Stadt

Horch amol! I hör nix.

Ja, des isch's jo grad! So still! Nix hört mr - koi Auto, koi Flugzeug,

koi G'schroi, koi Handy. Bloß Stille.

Do sottsich amol deine Ohra spitza. No dätsch allerhand höra.

Net bloß d'Vögel ond da Wend.

Ao d'Henna ond d'Schof von de Wiesa, ond ällamol ao a Gebruddel.

Woisch, meine Ohra send wahrscheinlich scho ganz marode. Sotte Feinheita hör i nemme.

I wohn doch Stadtmitte, mit ma sau Verkehr da ganza Dag. No bau dr halt a Häusle en Auadorf, wenn's en Geppinga so saumäßig isch...

Ja, moinsch denn du, do dät mir ebber sei rars Wiesle em Flecka verkaufa?

Hebet des dia Auadorfer net alles uff für ihre Kender?

I glaub, dii dätä mr scho nemma.

Wenn des ernscht moinsch, no frog-e amol rom.

Jetzt dua no langsam woisch, ob jetzt grad mei Frau als alta Geppingere do ruff will, - des glaub-i-kaum. Sui mag halt da Omtrieb viel meh als i.

Aber g'lishta dät mes scho, do hoba wohna, wisset ihr eigentlich no, wia schee des om eich rom isch?

Noi, wenn-da me so frogsch, manchmal weiß-es nemme.

Vor allem wenn dr Wenter wieder amol a halbs Johr dauret, so wia dr v'rgangene, no denk-e, kuset me am Fiedle, ihr schwarze Berg, i gang noch Teneriffa!

Do mueß-e jetzt doch lache! Wenn-e mr dii en Teneriffa vorstell!

Ohne Bulldogg, em scheena Hemmed ond em Hotel!

Koi Sorg, des duin-i et, i schnauf liaber hier dui guata Luuft, wia dass- e se mit am Flugzeug helfa verstenka dua.

Ja, dui guata Luuft, desisch de zwoit Wohltat, noch dera Ruah.

Ond des Grün erscht, des isch wia Arznei, i glaub, wenn-e äll Dag do rom ond nom gucka kennt, no bräucht-e bald koi Brill meh!

Jetzt komm no wieder uff da Boda! Dass da mir net no vollends abhebsch-

do wüßt i ebbas für deine Ohra ond für dei Nas ond für deine Auga-

aber des wär et ganz so still, drfür herzhaft ond o'bedengt zom Genieße!

Was moinsch jetzt du do?

I moin Kirchaglocka morgens om Zehne, hausgmachta Kartoffelsalat am Zwölfe,

Musikkapell am Zwoi ond Mitschala em Drui zom Kaffee.

Ond obneds nomol Musik, et ganz leis, ond en Haufa Leit zum Schwätza.

Jetzt han-es endlich begriffa. Wann lasset-er's denn wieder kracha?

Am letzta Julitag, am Samschtich, fanga mr a. Ond am ersta August, am Sonndich, goht's weiter.

Do komma mir no zu zwoit. Weil des g'fällt de Geppinger ao!

Gemischer Chor
Schützengesellschaft
Evang. Kirchengemeinde